

共同經課 - 1 使徒行傳十一章一節~十八節

1 使徒 kap tiàm-tī 猶太 ê 兄弟聽外邦人亦受上帝 ê 道理。2 到彼得上耶路撒冷 ê 時, hiah-ê 奉割禮 ê 人 kap 伊爭辯, 講, 3 你 bat 入去就近無受割禮 ê 人, kap in saⁿ-kap 食。4 若是彼得照次序對 in 排列講, 我 tī Iok-phàⁿ 城祈禱; 5 神魂遊 tī 象外 ê 時, 看見異象, 有一個器具親像大幅布, 縛四個角頭, tùi 天墜落到我 ê 面前; 6 我注目看, 詳細想伊, 看見有地上四腳 ê cheng-siⁿ、野獸、蟲 thoā, kap 天中 ê 飛鳥。7 Koh 聽見有聲 kā 我講, 彼得, 起來; thài 來食。8 我講, 主 ah, 斷斷 m̄-thang; 因為凡若粗俗 ê 物, á 是無清氣 ê, lóng 未 bat 入我 ê 嘴。9 但是聲第二 pái tùi 天應講, 上帝所 hō伊清氣 ê, 你莫得掠做粗俗。10 親像 án-ni 三 pái; tak 項物就 koh 收上天。11 忽然有三人 tùi 該撒利亞差來就近我 ê, tú-tú khiā tī 阮所 tiàm ê 厝外。12 聖神 kā 我講 tiòh kap in 去, 莫得分別。Koh 有 chit 六個兄弟 kap 我去; 阮 lóng 入 hit 人 ê 厝; 13 伊就 kā 阮講, àn 怎樣 bat 看見一個天使 khiā tī 伊 ê 厝, 對伊講, Tiòh 差人到 Iok-phàⁿ, 請西門, 稱做彼得 ê 來; 14 伊 beh 用話 kā 你講, 你 kap 你全家 tùi chiah-ê 話 beh 得 tiòh 救。15 我 tú-tú teh 講 ê 時, 聖神降臨 tī in, 親像起頭 tī 咱一樣。16 我就記得主 ê 話, 講, 約翰是用水行洗禮; 獨獨 lín beh tī 聖神受洗。17 Taⁿ 上帝既然用 chit-ê 恩賜 hō in, 親像 tī 咱信主耶穌基督 ê 時所 hō咱 ê 一樣, 我是 chī-chūi, 能阻擋上帝 ah? 18 Hiah-ê 人聽這話, 就靜靜, 亦歸榮光上帝, 講, Án-ni-siⁿ, 是上帝亦 hō外邦人反悔來得 tiòh 活命。

共同經課 - 2 詩篇一百四十八篇

1 Lín tiòh o-ló 耶和華。 Tùi 天頂 o-ló 耶和華; Tī 高 ê 所在 o-ló 伊。2 伊 ê 眾使者 ah, lín tiòh o-ló 伊。 伊 ê 眾天軍 ah, lín tiòh o-ló 伊。3 日 kap 月 ah, lín tiòh o-ló 伊; 發光 ê 星辰 ah, lín lóng tiòh o-ló 伊。4 天頂 ê 天, kap 天以上 ê 水 ah, Lín lóng tiòh o-ló 伊。5 Chiah-ê lóng tiòh o-ló 耶和華 ê 名; 因為伊一下命令, 就 lóng 受創造。6 伊將 chiah-ê 建立, 到永永遠遠; 伊有定例, boē 會廢無。7 Tùi 地上 tiòh o-ló 耶和華, 就是大魚 kap 一切 ê 深淵; 8 火 kap 冰雹, 雪 kap 雲霧; Thàn 伊 ê 話 ê 狂風; 9 大山 kap 一切 ê 小山; 結果子 ê 樹, kap 一切 ê 柏香樹; 10 野獸 kap 一切 ê cheng-siⁿ; 蟲 thoā kap 飛鳥; 11 世上 ê 君王 kap 萬民; 貴族 kap 世上一切 ê 審判官; 12 少年人 kap 在室女; 老人 kap gín-ná; 13 Chiah-ê lóng tiòh o-ló 耶和華 ê 名; 因為只有伊 ê 名受尊做高; 伊 ê 榮光 poāⁿ 過天地。14 伊興起伊 ê 百姓 ê 角, Hō伊聖 ê 百姓 lóng o-ló 伊, 就是以色列人, 親近主 hit-ê 百姓。 Lín tiòh o-ló 耶和華。

共同經課 - 3 啟示錄二十一章一節~六節

1 我 koh 看見有身 ê 天, 新 ê 地; 因為前 ê 天前 ê 地已經過去; 海也無 koh 有。2 Koh 看見聖城, 就是新 ê 耶路撒冷, 出 tī 天, tùi 上帝降落, 已經備辦便, 親像新娘裝飾來 thèng 候伊 ê 丈夫。3 Koh 聽見大聲 tùi 座位出, 講, 上帝 ê 會幕 tī 人 ê 中間, 上帝 beh kap in saⁿ-kap khiā 起; in beh 做伊 ê 百姓, 上帝本身 beh kap in tī-teh, 來做 in ê 上帝。4 Koh beh kā in ê 目調拭去 lóng 總 ê 目屎; 無 beh koh 有死失; 也無 beh koh 有哀傷, 喉叫, 痛疼; 前 ê tai-chì 已經過去。5 坐 tī 座位 ê 講, 我換新萬物。Koh 講, 你 tiòh 寫伊, 因為 chiah-ê 話是 thang 信, 是真實。6 Koh kā 我講, 已經成 lah; 我就是 A-lī-hoat kap O-bí-ka, 是起頭 ê Kap 路尾 ê。我 beh tùi 活命 ê 水泉白白 hō嘴乾 ê 人 lim。

共同經課 - 4 約翰福音十三章三十一節~三十五節

31 已經出去, 耶穌講, Taⁿ 人子得 tiòh 榮光, 上帝亦 tī 伊得 tiòh 榮光; 32 koh 上帝 beh tī 本身榮光人子, 亦 beh liām-piⁿ 榮光伊。33 細 kiáⁿ ah, 我 iáu 有 tiap-á 久 kap lín tī-teh。Lín beh chhē 我; 我所去 ê 所在, lín boē 能到; 我 bat kā 猶太人講, taⁿ 亦 án-ni kā lín 講。34 我用新 ê 誠命 hō lín, 就是 lín tiòh 相疼; 親像我 bat 疼 lín, lín 亦 tiòh án-ni 相疼。35 Lín 若相疼, 眾人 beh tùi án-ni 知 lín 是我 ê 學生。